

Inyarubha ya Paauru kwa Firimuni Ubhekangati

Inyarubha yinu ikaandikwa nu umutumwa Paauru kumutu wunu aari arabhirikirwa Firimuni. Irarorekana Firimuni aari ariikara murubhiri rwa Korosaayi (Abhakorosaayi 4:9). Aari muniibhi, naatu aari na bhambusa. Firimuni wuyo aari Mukiriisitu, na munyumba yaazi nimu bhaari bhariibhiringa Abhakiriisitu. Paauru na Firimuni bhakiimenya bhwaheene.

Paauru akaandika inyarubha yinu hanu aari mokebhoho murubhiri rwa Ruumi. Akaandika inyarubha yinu iguru wa mbusa wamwi wa Firimuni, wunu aari arabhirikirwa Unisimu. Irarorekana kubha mbusa wuyo akang'osa Firimuni. Akumara akarumana na Paauru. Neho, Paauru akamomenyeekererya Ing'ana Inzamu iguru wa Yisu. Akumara, Unisimu akiisirirya, akasabhuka.

Kwibhaga riyo, mbusa wawusi araang'ose umuniibhi waazi, akumara akagwatwa, umuniibhi waazi aari nu ubhanaja bhwu ukumwita. Nangu Paauru aari aratuma Unisimu kumuniibhi waazi Firimuni. Neho Paauru akaha Unisimu inyarubha yinu ahiriri Firimuni. Manyarubha yiyo Paauru akasabha Firimuni asung'aani Unisimu nchu umukindichazi, na ncha abhahiiri kwa Kiriisitu.

Amakeeren'ya

¹ Inyarubha yinu nandikiri inyi Paauru, omobhohwa iguru wu ukwerekeererya Ing'ana Inzamu iguru wa Yisu Kiriisitu, hamwimwi na Timoseo umwisirirya umukindichitu. Nirakwandikira awi Firimuani, umusiigwa wiitu, omohocha umukindichitu.

² Turakeerya nu umusubhaati Afiya nu umwitani umukindichitu Arikipu, hamwimwi na abhaatu bha risengerero bhanu bhari yika waazu.

³ Ihigangi no omorembe kurwa kwa Bhaabha Mungu, na kuMakuru Yisu Kiriisitu, bhibhi na niimwi.

Ubhusigi nu ubhwisirirya bhwa Firimuani

⁴ Ribhaga ryasi hanu nikukusabhira, niramukumya Mungu,

⁵ ku kubha niriigwa urakaja kwisirirya Umakuru Yisu na kubhasiga abharindu bhusi bha Mungu.

⁶ Nirasabha Mungu ubhwisirirya bhunu ukugwatana hamwimwi na niitwi, bhukunaji komanya bhwaheene urubhangu rwasi ranu tunarwi ku kugwatana na Kiriisitu.

⁷ Umuhiiri waani, ubhusigi bhwazu bhunzumiiri na kunaja bhukung'u, ku kubha usambarukiryi zekoro za abharindu bha Mungu.

Paauru arasabha Firimuani abheerere Unisimu

⁸ Naurubhu, nangu kurwa ku ubhunaja bhunu nihiirwi na Kiriisitu, nangaturiri kukuswaja kokora kinu ukwenderwa kokora.

⁹ Nawe iguru wu ubhusigi nirakwisasaama, ku kubha niinyi Paauru, umukaruka no omobhohwa iguru wa Yisu Kiriisitu.

¹⁰ Nangu nirakusabha iguru wu umwana waani Unisimu,* wanu nasakiiryi komomenya Kiriisitu, niri mokebhoho.

¹¹ Inyuma hayo, ewe aari atakwenderwa kwa naawi, nawe nangu areenderwa kwa niinyi na naawi waku.

¹² Nangu niragarucha kwa naawi, Unisimu wanu nisiigiri kumwuyu gwani gwasi.

¹³ Naari nirasiiga iikari uwaani, korereke abhone umweya gwu kunsakirya iguru waazu, hanu nikubha mokebhoho iguru wi ing'ana Inzumu.

¹⁴ Nawe nitiindiri kokora ryaryasi nitaana rugusa rwazu, korereke ubhuzumu bhwazu bhutabha ncha bhwi ihatiki, nawe bhubhi bhwa kwenda awi aumwene.

¹⁵ Hamwi, Unisimu akarwa kwa naawi kwibhagabhu, korereke ubhi nawe ribhaga irindi kemerano.

¹⁶ Kutangira nangwinu, ewe atari ncha mbusa kwa naawi, nawe ewe ni muzumu kukira mbusa, aangi umuhiiri umusiigwa. Inyi nimusiigiri bhukung'u, awi umusiigiri kunkira, ncha mbusa wi waazu, na ku kubha awi neewe mugwatiini nu Umukuru Yisu.

¹⁷ Mmbe, nangu ariibhi uramenya kubha inyi niri hamwimwi na naawi, usung'aani wuyo chimbu wangansung'aaniri inyi.

¹⁸ Na ariibhi Unisimu aakusaririryi ing'ana ryaryasi, hamwi uramutun'ya ekegero, untun'yi inyi.

¹⁹ Inyi Paauru, niraandika kokobhoko kwani inyimwene, nirakuriha. Nitakukuhiitya kubha

* **1:10 Unisimu** enzobhooro yaazi ni-wanu akwenderwa kokora ing'ana irebhe.

nirakutun'ya, ku kubha ku kwerekeererya kwani,
awi ukasabhurwa.

²⁰ Nangu, umuhiiri waani, onkorere rinu iguru
wu Umukuru, sambaarucha umwuyu gwani nchu
umuhiiri kwa Kiriisitu.

²¹ Nirakwandikira ganu, ku kubha niizi
uragiisirirya, na urakora ukiraho ganu nisabhiri.

²² Hamwimwi na gayo, onkonzere hu ukwikara,
ku kubha niriisega kumasabhi gaanyu, Mungu
aransakirya niizi kwa niimwi.

Amang'ana gu ukwaga

²³ Ipafura, omobhohwa umukindichani iguru wa
Yisu Kiriisitu, arakokeerya.

²⁴ Na abhahocha abhakindichani Maaroko,
Arisituru, Deema na Ruuka, bhusi
bharakokeerya.

²⁵ Ihigungi bhyu Umukuru Yisu Kiriisitu bhibhi
na niimwi bhusi.

**Ubhuragi Ubhuhya Mukigambũ chi Ikikiizũ
Ikizu: Ubhuragi Ubhuhya Mukigambũ chi Ikikiizũ (New
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553